

Hyväntekijät pyöräilevä

”Rintaa lämmittää”

HAAPARANTA

**Kiirastuorestain iltapäivä oli hullun tekevä Ica:n etuhallissa.**

**Team Rynkeby – järjestön pyöräilijät kokoavva rahaa Barncancerfondenhiin kahen rathan ja neljän jalan päällä.**

**Haaparannanlehti ja misunäarit saava yllättävän ihmisyen oppitiiman.**

Rynkeby – aatos tullee alunperin Tanskasta, mutta se on vuesta 2002 kasunu pohjosmaiseksi ilmiöksi.

Missä Luulajan polisit Jan Lundmark ja Petra Freudenthal osalistuva Malmö-osaston eustajinna.

– Valitettavasti Pohjos-Ruottissa ei ole kerhoja. Mutta mie olen kotosin Ystadista niin luonolinen kytkintä on olemassa, selittää Petra.

Freudenthal on vaikuttava hyväntekijä muila puolila kans.

– Minun työssä mie kohthaan paljon ihmisiä ja elläimiä, jotka varisevva systeemin toolien välistä, se kertoo.

Petra Freudenthal esittää haittavia tosiasioita.

– Häätty sanoa, ette tavalisimat lahjottajat on ihmiset, joila ittelä on taikka on ollu hankaluuksia. Tänä päivänä tuli esimerkiksi ensimmäinen lantti henkilöltä, jonka läänin polisit tunteva hyvin.

Keski-ikäset vaimot, ”kulttuuritätit” ja pansunäarit on hööliä antajia. Miehet, jotka on 30. ja 50. välilä ei osalistu paljon ollenkhaan.

Keskelä juttelua tapahtuu jotaki, mikä muuttaa Freudenthalin teesit ilmestykseksi ja kivitaluiksi. Jan Lundmarkin rahakukkarolle astuu se nuori vaimonpuoli joka kerjää sisäovien välissä ja se pannee aikamoisen osan päivän

kootuista lantista rahakukkarhoon. Seurakunta vaikenee ja älyää mitä osottamalla tapahtuu ja sitä seuraa kuvvaaminen.

### **Ihmisennä olemista**

Tämä nuori vaimo, kotisin Rymäniästä, kirjottaa koko nimensä allekirjotetun kirjoituskirhjaan.

– Mutta kaikin sanova minua Anaksi, se sannoo englanniksi ja hymmyillee arasti.

Stokholmari Mats Eriksson oon selskaapin työhevonen, joka istuu ja polkee motsuunihoijiksi muutettua italialaista raceria. Kyynelheet kohta tuleva ko se ottaa puhheeksi.

– Tämä oli tämän päivän anti. Rintaa lämmittää. Erikssonin innotus oon peräsin elämän koettelemuksista ja pienen liikheen hoitamisesta.

### **Yheksän nappia**

Mats Eriksson sai 2011 kunniaosotuksen ”Årets lobbyist” sen jälkhiin ko se oli tehny riikinkattavia kiertoreisuja monena vuona aleman ravintolamomsin puolesta. Tiet yhyit esimerkiksi tämän jutun kirjottajan kans Mataringin markkinoila 2012.

– Se reisu opetti mulle paljon. Jolle olkapäitä kohhautethaan suurissa kaupunkissa saattaa pienimissä paikkakunnissa olla elintärkeä päätös.

Puhheessa ollen siitä, mitä saathiin kokhoon, Eriksson soittaa puojin kokkouksen jälkheisennä päivänä.

– Met saima kokhoon 4.500 kruunua Barncancerfondeniin.

Ei lainkhaan paha, häh?

Ko kauppamies Kåre Mogemark oli luvanu antaa yhtä paljon ko Team Rynkeby saapi kokhoon niin koko rahasumma oon peräti 9.000 kruunua.

Ja reisu jatkuu.

**Bild: God sak2.jpg 97**

*Lasse Stenman, namn*

Fi Ihmiset, joilla oon samat tarpheet, mutta eri eelytyksiä.

Vasemalta: Jan, Ana, Mats ja Petra.

Meänkielennös: Bengt Pohjanen

Ekale: Rintaa lämmittävä työtä lasten hyväksi